



## d'hooseglunggi 2011

Dr Tutanchamun isch e Glatte  
Ligt dreydaussig Joor im Schatte  
Jetz stoot är uff und rebelliert gäge s Regime  
Dr Mubarag verlooet d Baragge  
Gägen in lauft en Attagge  
Au s Volgg hett gnueng das finde mir Vier legityym  
Wenn das by uns wuordi bassiere  
Wär kennt am maischte profitiere  
Deene gämmer denn dr Räschte  
Zem Glygg sin Gwehr no in dä Käschte

Dr Frey heert in dr Nati uff  
Das macht is aber schambar muff  
Well är hett doch sehr vill gmacht das hett me gsee  
Z Basel sott me gly ain sueche  
Wo nimm esoo duet ummeflueche  
Vom Penaltyphunggt wänn mir in nimmi seeh  
Uff de fremde Fuessballmatte  
Finde si in au kai Glatte  
Au d Fasnacht isch nid nach sym Sinn  
Är maint si pfyffe gäagen in

Dr Elton John isch Papi woorde  
Dorumm mache mir is Soorge  
Wär git Bruscht wär duet in wiggle wär git z Nacht  
D Uffgläärig wird do nid so glinge  
Well me kaa jo nyt erzwingen  
Das mit de Bienli und de Bliemli wär jo glacht  
Me muess au koche und au butze  
Dr IQ vo aim sottme nutze  
Do sait dr Jung my Gschicht isch sälte  
Die Zwai kenn ych vo Keerperwälte

Am Aescheplatz deert gits e Kampf  
Druggerpräss verliert vyyl Dampf  
Dr Tettamanti zieht dr Schwanz y är muess goo  
Är verkauft die Basler-Zytig  
Unter Drugg denn anderwytig  
Aim vo Basel dä hett Muet das muesch ihm loo  
Dr Moritz Sutter zahlt dä Bryys  
Dr Deal isch unter Dach und Fach  
Lieber d Baz in dr Hand  
Als dr Blocher uffem Dach

Es kunnt e Hoch es kunnt e Dief  
D Wätterlaag isch zimmlig schief  
Im Schwoobeland saichts oobenaabe es isch e gruus  
Dr Wätterfrosch gheit ab dr Laiter  
Es wird nimm scheen by uns das saiter  
Dunggli Wulge ziehn sich zämme in sym Huus  
Dr Kachel – Oofe isch am haitze  
Während d Maidli d Bainli spraitze  
Dr Bischof Koch wird Kardinal  
Die zwai z verglyche wär fatal

Dr Cloony sehr guet tarnt als Penner  
Goot am Moorge frieh zem Denner  
Hoolt sich Kaffikapsle uff die isch är scharf  
Bym uusekoo schlecht är drvo  
Är hett so vyyl als meeglig gnoo  
Vo deene Kaffikapsle won är gar nid darf  
S Bescht wird allewyyl kopiert  
Zu Guttenberg hetts nid kapiert  
Wär als falsche Doggter duet plagiere  
Sott halt vorhär mee studiere

GC hänn mir uff dr Latte  
Jetz hänn die kai Schuttmatte  
Und dasch d FIFA Hauptstadt – ohni Stadion  
Dr Blatter Sepp das isch dä Depp  
Wo d WM am liebschte im Vallis wett  
By 50 Grad in dr Wieschti dasch e Hohn  
Zrugg zem Harturm dämm Debakel  
S Ziiri schutte hett sy Makel  
Egal ob Horge oder Schliere  
D Hauptsach isch – si dien verliere

Am Berlusconi syni Fratze  
Isch doch scheener ohni Glatze  
Trotzdämm wärs doch fein vo ihm wenn är wuord goo  
Sy Sexskandal isch jo banal  
Wenn är no kennt das wär fatal  
Mir glauben alli nid ass im syn no duet stoo  
Wär soone groosses Land regiert  
Derby d Realität verliert  
Dä Nochwyys gilt als Fundamänt  
Zem neije Fifa-Preesidänt

Ai Tunesier zimmlig fyt  
Macht e Rais die goot sehr wyt  
Mitem lääre Fuessballbus vom FCZett  
Fascht kai Platz är zwängt sich yyne  
Kunnt sich vor wien e Sardyyne  
Är verliert no dr Räschte vom sym Fett  
Won är die Klappe duet verloo  
Und merggt är duet in Ziiri stoo  
Probiert är langsam sich uff z raffe  
Und loot sich freiwillig ussschaffe

Mit Dioxin im Aierdätsch  
Macht my Maage gly dr Lätsch  
Wenn das Huhn no d Vogelgrippe hett wird's schlächt  
Wottsche e Gottlett uff dym Däller  
Dängg ans Tamiflu im Käller  
D Roche verkauft dä Saich no y find das nid Rächt  
Kaine kennt dr richtig Grund  
D Medizin isch uffem Hund  
Nur BSE kunnt – asses waisch  
Vo dämm B..B..B..Binderfleisch

Die siebe Bundesreet vo Bärn  
Hänn sich uff aimool wider gären  
Die erschti Froog an ihrer Sitzig – was isch Drumpf  
Calmy Rey isch an dr Spitze  
Obwohl si nimm lang deert deut sitze  
Au d Mize Schlumpf das deent so dumpf isch uffem Rumpf  
Dr Malama mecht gären an d Macht  
Hett fir sich au Wärbig gmacht  
Är stygt fir d Wirtschaft uffem Bärg  
Nur d Migros hett dr greesser Zwärg

Sott me nai stimme jo stimme  
nai stimme jo stimme nai stimme  
jo stimme nai  
Sott me nai stimme jo stimme  
nai stimme jo stimme nai stimme  
jo stimme nai  
Sott me nai stimme jo stimme  
nai stimme jo  
wenn goosch go stimme ischs e soo  
stimmsch du nai – denn mainsch du jo

---

Wottsche au by uns bänggle ?  
Schigg doch aifach e Brief in unser Boschtfach  
VSG Postfach 4365 4002 Basel  
Oder goosch uff, [www.vsg-basel.ch](http://www.vsg-basel.ch)